




Ina dallas numerusas attracziuns che carmalan. En in tempo snueivel descendan ils affons cun la suga sur il lag ora.



Linus Capaul e Tamara Defflorin avon la culissa dil Lag Grond. Cheu ei sonda e dumengia la fiasta cun circa 3000 affons.



**Curdin Pfister (69),
econom, Glion/Berna**



Tgei munta il romontsch per Vos?

Il romontsch ei buca miu lungatg mumma, el munta per mei denton patria. Damai che mes geniturs ein carschi si omisus a Glion e mia parentella ei da leu sundel jeu denton colligiau specialmein cul romontsch. Pli baul en famiglia, sch'els vulevan buca che nus affons capeschien entatgei, discurrevan els ensemen romontsch.

Co promovis Vos il romontsch?

Jeu promovel il romontsch cun viver parzialmein in tiara romontscha. Era sundel jeu adina aviarts per ed attaschaus a tut las spartas dalla cultura romontscha. Plinavon consumeschel jeu era las medias romontschas, quei ei ina sort promoziun persunala.

Tgei avegnir ha il romontsch?

Sch'ins observa il regress ch'il romontsch ha fatg ils davos decennis ston ins esser realist e quintar che quei lungatg sestezzi. Sch'ins observa denton il fenomen dalla giuvna musica romontscha, dalla frestga litteratura e tshellas activitads ella Romontschia san ins sperar ch'el vivi aunc ditg.

www.100onns.ch

reclama

Topaktuell
von Montag
bis Freitag

Nachrichten
näher an
Ihrer Region

Das Nachrichtenmagazin
«SO informiert» ab 18 Uhr
auf TV Südostschweiz.

La fin d'jamna dils affons

Per la 20avla gada aventuras e divertiment al Lag Grond da Laax

■ (anr/abc) Sonda e dumengia proxima han biars geniturs negina breigia da studegiar il program da recreaziun. Ei dat nuot da marcadar: Ils pigns vulan ir alla fiasta d'affons a Laax. Certas attracziuns paran isadas. Per exempel schar smincar la squadra digl Europapark Rust, quella vegn mintg'onn a Laax, dapi onns ha ella il termin fix el calender dalla stad. Tuttina sco biaras famiglias dalla Bassa che planiseschan vacanzas a Laax pervia dalla fiasta d'affons. Tut che spetga vess sillas attracziuns unicas ch'ei dat. Per exempel reiver sin harassas, zambergiar, sgular culla suga dils pumpiers, lu la tenda culs luvratoris creativs. La purschida alla fiasta d'affons ha strusch cunfins. Ils organisaturs han fatg l'experientscha ch'ei drova buca mintg'onn novas attracziuns. «Ord il sempel motiv ch'els affons carezan las existentas», declara Tamara Defflorin. Ell'ei responsabla per las medias enteifer il comite ch'organisescha la fiasta d'affons da Laax. Ils dus gis

vegnan rodund 3000 affons, vitier aunc geniturs, tatts e tats, padrins e madretschas. Tuts gaudan las sentupadas al Lag Grond, sia riva, l'aua ed il contuorn ei in parc da divertiment cun purschidas originalas.

La fiasta d'affons da Laax ei, ensemen cun quella da Savognin ch'ei mintgamai in'jamn'avon, l'attracziun principala dalla stagiun da stad. Indigens e hospis carschi san exact che la viseta ei quasi ina obligaziun – semegliont sco tiels gronds igl Open Air Lumnezia a Degen. Ils pigns han «lur» termin a Laax. Ina differenza dat ei: L'entrada alla fiasta d'affons ei in bionto pli favoreivla. Per entrar ella tiara dils giugs e divertiment a Laax paga mintg'affon in da tschun francs, e buca dapli.

Linus Capaul presidescha il comite d'organiziun, e quei dapi 20 onns. Ei seigi per el definitivamein la davosa gada, puntuescha il scrinari e lauda l'excellenta collaboraziun digl entir team. Sia suc-

cessura daventa Sybille Coray. Igl onn 2000 ei la fiasta stada per l'emprema gada a Laax. Las experientschas da 20 onns muossan ch'els biars affons han negina breigia da star colonna durant ina mes'ura – per saver guder zacontas secundas il «kick» da sgular culla suga dils pumpiers, per schar smincar ni per guder autras purschidas. Las tendas da zambergiar vegnan probabel ad esser occupadas trasora. Ella tenda gronda dat ei uonn ina sentupada cul «Zauberduolino Domenico», ed allas 17.00 ei leu mintgamai il concert cun Sümmarvoogil ed il chor d'affons. Ella Cularta, situada sigl areal dalla fiasta d'affons, dat ei mintgamai la sonda- e la dumengia endamaun allas 10.30 in concert classic cul tetel «Zirkus Zirkus». Leu san ils affons era tedlar praulas.

Alla fiasta d'affons vegn era consumau proviant. Sper 500 kilos pommes-frites drova la cuschina rodund 1500 ligiongias. Igl ei per bia buca la suletta

purschida per dustar fom, seit e quendas.

Dapi ch'ei dat la fiasta ei il prezi d'entrada buca semidaus. Per in da tschun francs per affon san ils geniturs schar entrar lur pigns ella tiara dalla cucagna. Igl ei in parc d'attracziuns ch'ei limitaun sin ina fin d'jamna. Auter che tier il Lego-land, Gardaland, Rust ni auters parcs ei la fiasta d'affons da Laax ina specialitad grischuna, entatgei unic per affons da dus tochen 13 onns. Il comite d'organiziun sa porscher l'occurranza da cult grazia al sustegn finanziel, material ni persunal da fatschentas, privats, uniuns e maun public. Uonn dumbra la gliesta da susteniders varga 100 numms. Quella fiasta d'affons funcziunass era buca senza ils biebein 200 voluntaris dall'entira Svizra ch'ei in acziun la sonda e la dumengia.

La fiasta d'affons a Laax ei sonda e dumengia proxima, ils 20 e 21 da fenadur, mintgamai dalas 10.00 tochen allas 16.45. Il gi finescha ella tenda gronda cullas producziuns e concert.

Informaziun e divertiment

Emprendist(a)s dalla Distec SA a Mustér ein stai sin viadi

■ (anr/hh) L'excursiun dallas emprendistas e dils emprendists dalla Distec SA a Mustér ha saviu vegnir organisada da bialaura en cumbinaziun cun informaziuns, tensiun e divertiment. Els puncts culminants ein stai ina viseta el tunnel da basa dil Gottard e divertiment cun go-kart. «Fetg interessanta ei l'investa dil tunnel da basa dil Gottard al portal dil sid a Pollegio/Blizuna stada», scrivon ils responsabels en ina communi-

caziun als mieds da massa. Leu han las emprendistas ed ils emprendists survegniu in tschuppel informaziuns ed han cheutras saviu emprender bia. En quei connex ei era la componenta tecnica per las vegnetas polimecanistas ed ils vegnets polimecanistas buca vegnida alla cuorta. Aschia han els saviu prender investa d'in vehichel d'engaschament ed in tren da stizzar fiug ch'ha custau buca meins che 16 milliuns francs. Cheutras

han els saviu far inaga experientscha cun in auter sector tecnic. Suenter quell'orientaziun ei vegniu cuntinuau cul viadi a Locarno-Magadino. Sigl iral da go-kart han ils giuvenils saviu sedivertir. Suenter treis cuorsas ein ils campiuns stai erui ed ein vegni honorai. Mo era il divertiment culinari ha buca muncau quei di. Aschia ein las emprendistas ed ils emprendists returnai plein forza e cun bialas impressiuns e regardientschas anavos a Mustér.



La viseta a Pollegio/Blizuna al portal dil tunnel da basa dil Gottard.



Divertiment sigl iral da go-kart.

LUMNEZIA

Brunch el «Da casa» Val Lumnezia

(mc) Damai ch'els purs dalla Lumnezia ein buca pli prompts d'organisar igl apprezzau solver puril pil di dalla Fiasta naziunala digl imprend d'uost ei il Da casa Val Lumnezia – sin giavisch da pliras varts – prompts da surprendre quell'incumbensa.

Il «brunch da casa» ha perquei liug igl imprend d'uost dallas 09.00 entochen allas 13.00. La purschida culinaria vegn embellida cun in program da divertiment. Da quel separticipeschan la gruppa da sunatibas «Trio Alpin» sco era la gruppa da cant indigena Canorus sut la direcziun d'Alexi Nay. Il plaid festiv per la Fiasta naziunala vegn cusseglier dils stans Stefan Engler a tener allas 11.00.

Il solver cuosta 35 francs per carschi e 15 francs per affons. Empustaziuns pon ins far entochen sil pli tard ils 30-7-2019 al secretariat per telefon 081 920 61 61, mo era sut info@da.casa.ch tochen sil pli tard ils 30-7-2019.

Las cussadentas ed ils cussadents sco era il persunal dil Da casa Val Lumnezia selegnan da vossa viseta e fan in cordial beinvegni.